

linea

genda

6



K-VI-6



LECHOPOEDEIA,

SEV

In vernâ renouatione studiorum

ACADEMICORVM

ORATIO.

*De Academicâ institutione in Celebri frequentia ad  
Aedes S. Anne, aramq. D. Ioannis Cantij  
S.T.D. & Profess: in Academia Crac.*

*Die 6. Calen: Maij. Anno*

*1 6 3 8.*

A

Nobili STEPHANO de Radzanow NISZCZYCKI,  
S. R. M. Cubiculario, Dialecticæ Studioſo,

Habita.

*Ex palestra Dialect: Nouod. per: M. Nicolaum Su-  
likowski Alma Vniuersitati reuerenter  
oblata.*

GRAC. Ex Officina Francisci Casarij.



*Laurentius Grimalius Lib: I. de Optimo  
Senatore.*

Ciues in Academiis educari debent  
ad honestè viuēdum & Rempub:  
gubernandam: ob idq; Respubli-  
ca curare debet, vt scholas habeat  
virtutum omnium tanquam of-  
ficinas, ad quas iuuenes sicuti ad  
messem bonarum artium com-  
meare debent, virtutum discipli-  
narumque fructus ex his repor-  
taturi.



*Illustri & Adm: Reuerendo Dño,*

**D. MATTHIÆ DRWECKI**

**PRÆPOSITO BIALEN: BRESTEN:**

**ad Ædes S. Barbaræ, Woynien: P.**

**Domino & Patrono**

**S. & P.**



*Institutionem Academicam Tibi Illu-  
stris & Adm: Rñde Domine, tantò  
animi ardore dedico, & consecro, quã-  
tò amoris affectu bonorum ingenio-  
rum, altricem Academiam nostram  
complecti te non ignorem. Cùm enim longo tempore  
penitus considerarem, quid Tuo amori in Musas A-  
cademicas, & meo in Te studio magis responderet, ido-  
neum nihil magis inueni, quod te virum multis nomi-  
nibus gratiosissimum, fide præstantissimum, moribus a-  
mœnissimum, totum ad humanitatem & intimam a-  
micitiã natum delectare possit; quàm institutionis  
Academice commendationem. Tuo enim adminicu-  
lo, & sedulitate in Podlachia, ita Academice literæ  
florent atq; vigent, quas toto pectore tueris, ornas, a-  
lis, fones, vt illa regio deserta, nouam faciem pietatis*

*A 2*

*inducere,*



induere. Et quasi ad omnem humanitatem renasci videatur, cum literis Academicis tuo presidio propagaris sese animari cognoscat. Ne longius abeam, quicquid prestantissimum, quicquid honestissimum, Et quid per quam excelsum ac sublime, in illo orbe reperitur, quo turpitudine scelerum eradicatur, Et virtutum splendor inseritur, id totum maximis tuis vigilis, labore etiam non mediocri sumptu comparatur. Nobilitata est tua virtus, non modò per uniuersam Podlachiam, Volyniam, verum etiam in Alma Vniuersitate nostra Crac. Emporio omnium scientiarum, sedulitas in propagandis studiis literarum Et pietatis laudata: ut alter Coll: Bialen. meritò conditor possis nominari. Etenim si pie memorie Christophorus Wilski, qui fundamenta ampla Et decora iecerit, si Illustrissimus Princeps Alexander Ludouicus Radziwil, copiosam dotem assignarit. gloriosum nomen apud consequentem posteritatem conditoris obtinuit: tum tu profectò Reuerende Domine, quòd ultimam manum apposueris, quòd Priuilegia ab Academia Cracouiensi receperis, alter parens illius Collegij omnino es predicandus. Tuo labore effectum est, ut illa edes Musarum confirmaretur recta, tu erarium tua industria assignasti, ex quo  
premia



premia laborum suorum Professores, de Repub: literaria bene meriti desumerent. Qui locus tam multorum ingenia excitat, ut in contentione eruditionis, in puluere literario, iucundum fore, sub onere professionis consensescere arbitrentur. Non torpescunt talium hominum ingenia, quae tua liberalitate ornas, foves, promoues, nec virtutum Tuarum Heroicarum memoriam ullo temporis impetu consumi patientur. Fuisse aliquando in Podlachia Matthiam Drwecki, Illustribus Praesulibus similem, Lubranscio pietate, Olesnicio liberalitate, Tylicio & Gabrieli Wladislawio amore, erga bonas literas, & si quid aliud in singulis priscorum monumentis insigne fuisse legitur, in Te uno comparabunt. Quod si Tuum beneuolum erga me animum recensuero, sic profecto non dubitabo affirmare, Te R. D. probasse Tibi ipsi neminem unquam hominem chariorem fuisse quam me Tibi, nullum unquam periculum pro meo bono fugisse, pro gloria contendisse, honores meos ad Ecclesia bonum & salutem meam singularibus suasionibus gubernasse. Gratus igitur, & non immemor tantorum beneficiorum, si non referre gratiam, certe propensam promptamque animi voluntatem mediocri hoc officio declarare volui. Tuorum



enim beneficiorum apud me memoriam nolui consenscere, verum ita quotidie animo obuersari, ut ne tum quidem cum praesens experirer, aut recentior, aut etiam iucundior humanitatis tuae sensus esse potuerit. Habe ergo me memorem gratitudinis erga te meae, iam non Oratione tantum inculta & puerili, sed re quoque declarate. Precabor ego Deum, qui istas virtutes largitus est Tibi, ut easdem velit sibi, Ecclesiae, Patriae, faustas ac felices esse, & qui istum concessit ardorem animi in Musas Academicas, idem benignitate sua Diuinam prouehat, beneque fortunet incolumem. Vale Patrone amplissime, nostrasque ut cepisti colonias Academicas illis in regionibus illustri pietate & auctoritate Tua promoue.

Illustri D. T.  
addictissimus

M. Nicolaus Sulikowski  
Profess: Dialect: &  
R. Nouod.



# ORATIO.



I quis antea mirabatur, Clarissimi Doctores, Excellentissimi Professores, cæteriꝑ; Nobilissimi Auditores, quid causæ esset, quòd in Regno Poloniæ, propugnaculo totiꝑ; Christianitatis, & theatro quasi militaris disciplinæ; Heroes inuictissimi, belli Duces peritissimi, Senatores prudentissimi, & virtute & rerum gerendarum, dexteritate celeberrimi Equites inuenirentur, qui publicum bonum, Ecclesiæ, & Patriæ integritatem, constantissimè defendere eniterentur. Hoc tempore miretur potiùs, vnumquemque Ciuem, magis communi vtilitati, ad conseruandam amplitudinem Regni, quàm suis commodis prospicientem. Non expedit de vniuscuiusq; constantia cogitando memoriam repetere, vnâ tacitâ cogitatione mentis reuocare potestis, qui ex amplissimo ordine Senatorum & corona Nobilium, omnibus ornamentis Rempublicam ornarint, auxerint, conseruarint. Eos autem qui cultum diuinum, pietatis incrementa, studiorum vim, quibus humanæ mentes excoluntur, erexerint, promouerint, firmarint: non solum lætos & hilares omnes labores superare, sed etiam doctissimos fortissimis, atq; optimis Ciuibus, nunquam morituram laudem comparare cum dispendio propriæ salutis. In quo cum multa sint incredibilia, tum hæc laude digna, quia singularia, quod iam



iam non per hos diurnos labores, non per ingenia varijs  
disciplinis exulta, & multiplici scientiarum dote propa-  
gata, sed per generosam Regni prolem, optimam iuuen-  
tutem, optimis Ciuibus, & Regno & Ecclesiæ, ornamen-  
tum adferre conantur. Et quod maiores nostri ferro, ar-  
mis, manu & multitudine exercitus propàgarunt, idem  
suo studio, & iuuentutis in Regno institutione doctrinâ  
se promoturos pollicentur. Feruet in illis incredibili ar-  
dore bonæ institutionis genius, ad difficillima quæuis pro-  
vusu & ornamento Regni aggredienda, professio profes-  
sioni, Lectorium Lectorio, commutatio alteri commu-  
tationi palmam præripere gestit. Non deest in illis flam-  
ma hæc nobilis, vt pietatem in iuuenum animos inferant,  
sudant, contendunt, vigilant, commoditati & valetudini  
non parcunt, vt Academicæ institutionis alacritas, nequa-  
quam de veteri suo feruore remississe videatur. Quicquid  
studij & beneuolentiæ, quicquid gratitudinis erga Re-  
gnum Poloniæ habent, quicquid voluntatis, id oblata  
occasione testari volunt candide. Maior in illis non est  
voluptas, nec solidioris gloriæ possessio, quàm vt Regni  
Poloniæ amplitudinem quocunq; modo promouere pos-  
sint. A Vobis modò Ornatissimi Auditores, ea qua par-  
est animi submissione peto, vt me de rebus hoc loco &  
tempore conuenientissimis, hoc est de Academicâ insti-  
tutione aliquot verba facere meditantem, beneuolâ at-  
tentione, quod idem Vestra humanitas vna mecû à Vo-  
bis postulat subleuetis.

[Magna



Magna quidem felicitas priuatis familijs ex perfecta iuuenum institutione confurgit, cùm filij parentibus succedentes, vniuersam familiam, & prudentiâ morum, & integritate vitæ, non modò tuentur & conseruant, sed etiam exornant, & amplificanc, sed maior publico Magistratui claritas ex cultura animorum iuuenilium exoritur. Nam perfecti Ciues efficiuntur, viri ætate, moribus, & sapientiâ insignes euadunt, qui præsertim à teneris annis virtutum honestis actionibus exercendis consuescunt. Nam vbi perueniunt ad maturiorem ætatem, regūt Rempublicam feliciter, prudenter in Senatu sui Regni consilia proponunt, in consessu virorum Sapientum, cum dignitate & laude dicunt sententiam, veram religionem, fidem, sacra, Romanorum Pontificum sapientiâ Cæremonias institutas, à Maioribus acceptas, sacrosanctè per contentionem ab aduersariorum impetu, cauillationibus, imposturis defendunt. Etsi necessitas exigat, ipsiusque rei negotium extorqueat, cum fortunis vitam chariorem rebus omnibus vouent atque consecrant. In bona institutione, & Regnorum felicitas, & humanæ vitæ stabilimentum statuitur, quam qui reiicit, & gloriam & virtutem reiicere videtur. Illa facit regale imperium, amplitudinem regiam, reuerenter honorare, cum submissione obsequiorum, à tenerâ ætate ad labores tolerandos alacriores, & commodiores homines reddit, ad superandas difficultates vires corroborat. Græcia, vbi virtus domicilium suum fixerat, tantopere coluit institutionem

B

animi,



animi, postmodum ipsa Roma domina gentium complexa est, ut ex ea ad duo munia Reipub: applicaret, ad Magistratum videlicet, & militiam iuventutem. Hæc duo Regna, quasi duo Capitolia in toto orbe visenda, & spectabilia, & obseruatione legum, & armorum & fortitudinis gloriâ, & sapientiæ laude illustres bene intellexerunt, non præsidij magis, non murorum sepimentis, non fossarum munitionibus, non turrium propugnaculorumque firmitate, vrbes fulciri, quàm bona institutione vel rei militaris vel doctrinarum consuetudine. Cognouerat optimè Plato grauissimus Præceptor honestatis, non posse genus humanum absque gubernatoribus optimis, vel honestè viuere, vel feliciter gubernari. Præterea nunquam fore bonos in Repub. Ciues, nisi viri sint probatissimi, statim videlicet à tenerâ ætate diligenter exculti; ubi enim disciplina & institutio accesserit, non adolescentia sectatur insolentiam, adstrictam superbiam, non iuuentus assueta moribus bonis, dedita pietati, transit ad solutiorē vitam, non enervatur mollitie, non luxu dissoluitur, non voluptate effæminatur, sed ad bellicos labores tolerandos, ad excipiendos ictus hostium, in sole & puluere bellico, ad aduersam fortunam vincendam, conculcandam, generosa & fortis informatur. Viri autem non student auaritiæ, sed quid ius, quid æquitas, quid libertas valeat, maturo iudicio & prudentiâ grauissimis Reipublicæ negotijs confirmatâ prouident, atque ne vllam etiam minimam iacturam Respublica subeat, diligenter prospici-



prospiciunt. Cognouerunt generosi Regum & Principum Poloniae genij institutionem animorum, munus esse lumini regnorum omnium protectoris & gubernatoris eximium, ac proinde Academiam ex sacra foundatione, ex secreto Dei consilio erexerunt, ad æternum victuram Ciuium posteritatem, multiplici dote ornarunt, propagarunt, propagatam priuilegijs & legibus libertatis munierunt, munitam confirmatamq; impensè amarunt. Deum bonum ad iucundiora deflectit oratio mea, si mentes Diuinæ Fundatorum cælitus descenderent, & sua corpora egregijs gestis, & virtutum splendore resplendentia assumerent, spectarentque Regnum Poloniae diligentius, viderent in Scholis eruditionem, in templis sanctitatem, in Senatu consilium & prudentiam, admirarentur Clerum integritate vitæ ornatissimum, Professores Academicos comitate morum elegantissimos, pietatis feruore clarissimos, Lectoria numero studentium frequentissima, vel eruditissimis in omni scientiarum genere viris abundantissima. Senatum nec minùs grauem quàm Areopagitarum, nec minùs celebrem quàm Spartanorum, nec minùs splendidum quàm eo tempore Romæ fuit, quo illum Cynæas ex Regibus constare dixit. Faterentur Curules sellæ, quàm consultores optimos, & optimè Reipub. consulentes ex institutione Academica habeant, qui non rem priuatam, sed publicam vtilitatem spectant. Dicerent domicilia religiosis familijs consecrata, vnde viros pietate vacantes, lectionibus deditos, scriptis ingeniosis fidem



Catholicam propugnantes, in suis ordinibus includant, non aliunde nisi ex Academica institutione. Clamaret militia & audacter iactaret, præstantissimos Duces, vigilantissimos militum Præfectos, legionum Ductores, Tribunos, Primipilos, Centuriones in rebus necessarijs adesse, nisi ab institutione Academica. Dicerent insuper municipia & oppida, vnde Aduocati iuris ciuilis periti, iustitiæ patroni, æquitatis amantes, iniurias à pupillis propulsantes habeant. Ad extremum, Aulæ ipsæ Regum & Principum amplissimæ testarentur, Notarios integerrimos, propugnatores æquitatis fidelissimos, ratiocinatores vectigalium peritissimos, non aliunde se habere nisi ex gremio Academiae. Non amplifico Oratoriâ consuetudine rem, non attollo, non excito admirationes, sed cogitate vosmetipsi, quid maius huic Regno, aut præstantius institutio Academica præstare potuit, plurimi hanc amant, & antequam cognouerunt amare cæperunt, cum ob fidelitatem in instituendo diligentem, tum fidelem diligentiam in excolendis in eloquentiæ scientiâ ingeniis, quâ florentem Rempublicam Polonam ac beatam, alijsq; Regnis amplissimis anteire vident. Quot enim eloquentissimos viros cognoscunt, tot se aspicere clarissima lumina iudicant. Vos Nobilissimos Iuvenes in testimonium aduoco veritatis, & mei sensus iudices appello, qui non Iuris studio, non Philosophiæ disputationi, non Theologiæ contemplationi, non Medicæ facultati, animum concedere vultis, priusquam eloquentiæ gemmeum thesaurum



rum comparare laboretis. Constat enim Vobis, luce meridiana clarius, eloquentiam esse Iuris prudentiæ clypeū, Philosophiæ telum, Theologiæ scutum, Medicinæ certum antidotum; non possunt enim morborum dolores medicamento efficaciâ, aut herbarum virtute in corporibus humanis sedari, quàm linguæ suauitate flexanima. Promanant ex Paradiso quatuor flumina, vt lux veritatis Historia attestatur, cum quorum decursu, aurum, argentum, gemmæ, lapilli pretiosi, in orbem propter vsum & splendorem hominum adueniunt. Ex Academia tanquam ex Paradiso, non quatuor, sed innumeri fluij per totum Septemtrionem profluunt, vbi sunt gemmæ, vbi aurum, vbi lapides pretiosi, quibus Diademata Regum distinguuntur; Virtutes inquam & Scientiæ. Ex Academia margarita illa pretiosa, pura sinceraque Religio, quam omnia bona concomitantur promanat; tum aureus ille imber pietatis, in Diuos, in Patriam, in vniuersum Regnum Poloniæ erumpit, & vberriimè irrigat vniuersos. Sed audio à tergo quosdam susurros, quòd nonnulli oggiant institutioni Academicæ, Catadromum licentiæ eâ esse aiunt. In quo Regno tandem hoc vanissimi homines obijciunt, nempe in eo, quod rigorem & seruitutem tanquam perniciosissimam pestem execratur, libertatem autem, omni auro pretiosorem, & animi studio, corporis, omni contentione tuetur. Nouit Academia & optimè nouit, quòd ingenia Nobilium discipulorum seueritate imminuantur, quòd rigore generosa indoles extin-



guatur: cùm ad meticulosam potiùs, quàm amicam obedientiam eos constringat, supercilium tetricâ grauitate vestitum. Non enim intelligunt puericidæ tales, qui discipulos immoderatè feriunt, & in perpetuo timore retinent, suam esse culpam, vt quò natura ipsorum propendeat, coniectura fieri nequeat: quinimò animus illorum in hoc ipso obtunditur, & comprimitur naturalis vigor, vt viles & abiecti euadant; ac dum in omnibus suis actionibus impingere se metuunt, semper impingunt, & suo ipsorum odio, in desperationem cadunt, & quod est sanè periculosum, quandoquidem desperatio omnium malorum extremum sit. Bucephalus Philippi post Alexandri Magni Regis generosissimus equus, cùm durius tractatus fuisset, adeò sauius & refractarius est effectus, vt neque fessorem admitteret, nec vocem cuiusquam pati vellet, ideo inutilis iudicabatur. Aduertit hoc Alexander, & cum indignatione tulit, quòd tam ingenuum equum perdere vellent, accedens eum habena comprehendit, & contra solem stare fecit, quòd eum ex vmbra metu consternari aduertit. Tunc demum paululum sedato, & cicurato sensim, saltum arripiens, insedit, eumque ad nutum vertit, & ad cursum incitauit, adeoq; obsequentem reddidit, vt herum infessurum, sponte sua, genua submitrens, exceperit. Ita liberaliter educati discipuli, destruuntur fucatâ grauitate, Stoicis supercilijs expressa, animum ad omnia quæq; natum præclara & honesta ex rigore abijciunt, & statim propter seueritatem infelicem, non solum

Præce.



Præceptoribus inuidiam, verum etiam ipsis artibus, atque institutis laudabilibus odium ac contemptum conflant. In rebus Patriæ prospiciendis, vel publico bono promouendo tales discipuli, industrij, & felices putabuntur? Credite Auditores, conspectum virorum reformidabunt, in amplissima Corona virorum, Senatorum, Equitum, tria vel quatuor verba, cum timore, propter animum in perpetuis perturbationibus exercitatum proferre nescient, oculi eorum & supercilia peruertentur, vultus palliet, os titubabit, comæ erigentur, genua contremiscent, vox faucibus hærebit, aut quod ignominiosum erit ad codicillos confugient, inopes in dictis, miseri in factis, turpes in moribus. Academica institutio coniuentia vel saltim minarum remissione facit obsequentes & morigeros discipulos. Instituit eos non cogendo ad plagas, non illis infligendo cicatrices, non querulos gemitus, lamenta excitando, detestaciones, diras, non modò in Præceptores, sed etiam in parentes, aut quod pudet dicere in seipsos non commouendo. Fingi hæc putatis, quæ patent, quæ nota sunt omnibus. Benigna est mater Academia, non repudiat, non aspernatur peregrinos, humana est, humaniter omnes pauperes & diuites colit, & obseruat, plebeios & nobiles, exoticos & domesticos, æquali amoris cultu prosequitur, summos, infimos, mediocres, & studio & propensione animi excipit, peregrinos ita fouet, vt domesticos ab eis non secernat, sed eodem iure, iisdem priuilegijs, beneficijs, honoribus, perfrui secum patiatur.



patiatur. Non timeo Auditores, ne affectu amoris in studia Academica prouocatus, libentius hæc in matrem Academiam ex sinu cordis aperire videar, quàm verius. Enimuerò etsi eximium id esse debeat, tamen ita communis omnium mater Academia, vt in communi amore, panè & æqualiter versatur amor meus, non potest verbis exprimi, nec mente concipi, aut calamo exarari, quantum ex Academica institutione vtilitatis Regno, & pietatis Ecclesiæ, & iustitiæ iudicijs proueniat. Quin sic attendite, nempe & sententiam de institutione Academicâ approbate. Delectant vos tanti honores Doctorum, post Regum aut Præfulum tiaras primi in terris, Academia singulis & vniuersis, tanquam præmium studiorum suorum liberalis mater confert. Rapiunt vos cum voluptate in admirationem Philosophicæ laureæ, quæ homines exornant, & honorum titulis magis quàm fumosæ imagines condecorant, cùm extra fortunam sint, Academia hanc claritatem, tanquam munifica Domina, inter omnes distribuit. Gaudetis, & suprâ modum gestire animo non cessatis, quòd viri eruditi emineant dignitate, & digni promoueantur ad honores, promouet Academia tanquam prudentissima Magistra. Plurima eorum exempla habemus, qui nobili genere in Regno Poloniæ claruerunt, Academicorum honorum titulos non minori studio ac alacritate prensarunt, quàm si Romani candidati in Campo Martio sub tempus Comitiorum Centuriatorum Consulatum aut Præturam affecuturi fuissent. Talis aliquando



aliquando extitit IOANNES à Teczyn TECZYNIUS,  
qui vt nobilissimæ familiæ suæ claritatem augeret, Ma-  
gisterij gradum in Academia assumpsit, & primus in Re-  
gno Poloniæ Castellanus Cracouiensis, ornamenta ho-  
norum suorum duxit. Talis fuit ZBIGNEVUS OLE-  
SNICIVS, qui institutionem Academicam tanto di-  
gnabatur honore, vt non tantum Contubernium Hie-  
rosolymitanum, regali munificentia erexerit & fundârit,  
verùm etiam insignia quæ Baccalaureos ab alijs ordinibus  
distinguunt, galero ArchiEpiscopali ornatus, publicè per  
plateas gestare non erubuerit. Talis fuit IOANNES  
OCIESCIVS, qui in Academia Baccalaureus creatus,  
ex eruditionis honore ad amplitudinem supremam Can-  
cellariatus in Regno est euectus, qui Capitaneus deinde  
Cracouiensis, factus, prudenter & feliciter salutem Reipubli-  
cæ prospiciebat. Tales sexcenti alij fuere, KMITA à  
Wisnicz, ANDREAS ROZA, IOANNES LV-  
BRANSCIVS, PETRVS TOMICIVS, qui pu-  
blicis testimonijs probati Academiæ artium liberalium  
Magistri, postmodum ViceCancellarij Regni sapientes,  
& sancti Episcopi in Ecclesia Dei vixerunt. Nemo ora-  
tione consequetur, Academiæ ardorem animi, quo in  
amplificandâ vera religione succensa est, quis verbis ex-  
plicabit, labores eius pro sanctitate, iustitiâ propagandâ,  
ab eadem susceptos, quis ad viuum exprimet? Erant pe-  
stes in Regno Poloniæ, quæ oppida funestabant, vrbes  
incendebant, Hæresis videlicet & Idolatria. Furebat hæc  
C pestifera




pestifera contagio per domos Ciuium, per palatia Ducum, ædes nobilium pariter deformabat, & crebris funebribus, illorum animos æternis flammis cremandos absu-  
mebat. Aderant ex Academicâ institutione viri, veluti à Minerua adamantino scuto doctrinæ communiti Persei, qui monstra hæreseon fugarunt ac profligarunt. Acceperunt arma ad tales Hydras superandas, non ex Lemniacis insulis, sed ab Academia, & gloriosissimè vicerunt. Indixerat bellum Lutherus, cum suis infelicissimis quos exclusit ad victimam Dæmoni pullis, Ecclesiæ Romanæ, tanquam Terræ filius, cælitibus periculum minitabatur: ex Academia tãquam ab ære fulmine ictus iacuit. Monstra illa quæ ingentem flammam per Saxoniam perflabāt, Bohemiam exurebant, Vngariam in cineres conuertebant, incendio maximam partem orbis absu-  
mebant, STANISLAUS HOSIVS, Aegide Academicæ institutionis, communitus in Concilio Tridentino, fæda hæc monstra vicit, superauit, & trophæum perpetuum in Ecclesia Dei, ex hoste inmanissimo defixit. Non est opus hic longum numerum virorum doctorum in Academia educatorum, qui inueteratam vetustate audaciam hæreticorum compresserunt, recensere; quos omnium ætatum ordo mirabitur, & posteritas perfectam in eis sapientiam, simul quoq; amorem, sinceræ religionis propagandæ effigiem deprædicabit. Fuit ex Academiâ subtilis, acutus in refellendis Hæreticorum erroribus Socolouius, fuit solidus, ubique pius, grauis, modestus, & sublimis,  
Regibus

Rēgibus Poloniæ gratus, & consequenti posteritati admirabilis. Non poterat sanè ex tali institutione, nisi talis & tantus vir euadere. Vnde plurimi sacræ eruditionis Antistites, & profanæ disciplinæ, Ciues docti prodire. Testis est Vngaria, quæ ab Academicâ institutione olim subtilissimos Doctores accipiebat. Testis est Bohemia, Morauia, quibus illa ex Lectorijs suis grauissimos & eloquentissimos verbi Dei præcones suppeditabat. Testis est Prussia, quæ huius alumnos, post modum suorum Magistrorum, & aduersus Hæreticorum insanam stultitiam constantissimos Catholicæ fidei defensores, acutissimos disputatores, non sine magna animi voluptate spectabat. Imò testis est vniuersus orbis Christianus, quod Academia pro Ecclesiâ charissimâ, cui semper se, fortunas, vitam debere confitetur, constantissimè opposuerit. Delineavi vt potui institutionem Academicam, non ita quidem vt excellentia eius postulabat, hoc enim in tanta breuitate temporis vix aliquis ex summis illis eloquentiæ proceribus, præstare valuisset, sed prout facultas virium mearum permisit, & grati animi erga Matrem Academiam propensio. Studeamus per Deum immortalem, hanc scientiarum conseruatricem, magistram institutionis, vtilem patriæ & gloriolam, Regno necessariam, sedulitatis Archetypum, humanitatis aram, nulli bonorum inuidiosam, nulli malorum addictam, matrem modestam, innocentem velimus ornare & defendere. Ecce nobis vbera scientiarum quæ maximè cuiq; in hoc Regno sunt  
necessa-




necessariæ, propinat. Nam exceptis illis scientijs, quæ de  
natura rerum, de moribus hominum, de conuersionibus  
orbium cælestium, & eorundem conditore tractant, Poë-  
tam ingeniosissimum, Oratorem disertissimum, Histori-  
cum grauissimum, Geometram diligentissimum, Diale-  
cticum neruosisissimum, Grammaticum eruditissimum, &  
vniuscuiusque artis Professore ac Doctorem excellen-  
tissimum, quorum optimis ingeniorum dotibus fruamur.  
Hoc præcipuè verno tempore, cùm miles se ad arma ac-  
cingit, belli labores sustinere non dubitat; agricola vo-  
merem arripit, arare contendit; nauclerus cimbam con-  
scendit, nauigare percupit. Nobis Studiosis patent Le-  
ctoriorum portæ, aperta sunt Classium ostia, manè, me-  
ridie, vesperi, quocunq̃ue tempore, quacunq̃ue  
hora quicquid artis postulamus, modò  
re ipsa non voto tantùm veli-  
mus & reperiemus.

D I X I.










A. - 3



848864 Bibliotheca 28 000,-  
P.P. Camaldulensium in Bielany

Depozyt w Bibliotece Jagiellońskiej



03947

K.VI.6



